



REPUBLIKA E SHQIPËRISË
KOMISIONERI PËR MBROJTJEN NGA DISKRIMINIMI
DREJTORIA E ÇËSHTJEVE PROCEDURALE LIGJORE DHE MARRËDHËNIEVE ME JASHTË

Nr. 655 Prot Tiranë, me 12.11.2013

Lënda: Dërgohet rekomandim për sistemimin e tregtarëve rom

Drejtuar: **Z. Angjelin FIRZA**
POLICIA BASHKIAKE

LEZHË

I Nderuar Z. Firza!

Komisioneri për Mbrojtjen nga Diskriminimi në përmbushje të qëllimit të ligjit nr. 10 221 datë 04.02.2010 “Për Mbrojtjen nga Diskriminimi” për të garantuar të drejtën e çdo personi për barazi përpara ligjit, mbrojtje të barabartë nga ligji dhe mbrojtje efektive nga diskriminimi dhe çdo formë sjellje që nxit diskriminimin si dhe bazuar në kompetencën që i jepet në bazë të nenit 32, pika 1, shkronja “f”, të këtij ligji, për të bërë rekomandime për çfarëdo lloj çështje që lidhet me diskriminimin, parashtron sa më poshtë vijon:

Në kuadër të projektit me titull “Për mbrojtjen dhe promovimin e të drejtave të personave të diskriminuar”, të Komitetit Shqiptar të Helsinkit (KShH) në partneritet me Komisionerin për Mbrojtjen nga Diskriminimi, mbështetur financiarisht nga Zyra e Kooperacionit Zviceran në Tiranë, po zhvillohen Ditë të Hapura dhe takime me OJF-të në qytete të ndryshme të Shqipërisë, me qëllim rritjen e ndërgjegjësimit për Ligjin nr. 10 221, datë 04.02.2010 “Për Mbrojtjen nga Diskriminimi” dhe zbatimin e tij të plotë nga gjithë aktorët e përcaktuar në ligj.

Në Ditët e Hapura, Komisioneri për Mbrojtjen nga Diskriminimi dhe KShH kanë konstatuar si një ndër problematikat më të rëndësishme trajtimin e pabarabartë nga ana e policisë bashkiake ndaj personave që tregtojnë në rrugë. Gjatë kontaktit të drejtpërdrejtë me tregtarët, Komisioneri dhe KShH janë njohur me pretendimet se policia bashkiake ka larguar vetëm tregtarët që i përkisnin komunitetit rom nga vendi i tregtimit.

Ata pretendojnë se policia bashkiake i ka larguar pa të drejtë nga tregu duke i diskriminuar për shkak të ngjyrës ndërsa sipas tyre persona të tjerë janë lejuar të tregtojnë po në të njëjtin vend. Tregtarët kërkojnë që t’u sigurohet një vend për tregtimin e rrobave të përdorura.



Adresa: Rruga Sami Frashri, Nr. 10, Kati II, Tiranë
(Tek godina e Fondit Shqiptar të Zhvillimit)
Tel: +355 4 2431078
Fax: +355 4 2431077
e-mail: info@kmd.al
web: www.kmd.al

Kjo çështje është bërë publike edhe në media, ku është pasqyruar protesta e tregtarëve të komunitetit rom, të cilët kërkojnë që bashkia t'ju gjejë një vend për tregtimin e produkteve të tyre sepse, sipas tyre, tregtimi i rrobave të përdorura është e vetmja e ardhur për të përballuar jetesën.

Marrja e masave për sistemimin e tregtarëve është një funksion i organeve të qeverisjes vendore i përcaktuar në nenin 10, pika 3 të Ligjit Nr. 8652, datë 31.7.2000 "Për Organizimin dhe Funksionimin e Qeverisjes Vendore", ku parashikohet shprehimisht se komunat dhe bashkitë ushtrojnë një sërë funksionesh në kuadër të zhvillimit ekonomik vendor, ku përfshihet edhe "ngritja dhe funksionimi i tregjeve publike dhe i rrjetit të tregtisë".

Sa më lart, në mbështetje të nenit 1 të Ligjit Nr. 10 221 datë 04.02.2010 "Për mbrojtjen nga diskriminimi" ku parashikohen shkaqet e diskriminimit dhe nga ku komuniteti rom, si një nga grupet vulnerabël, hyn në objektin e këtij ligji, nenit 20 që ndalon diskriminimin në fushën e të mirave dhe shërbimeve, duke parashikuar konkretisht në pikën 1 (b) se personi juridik që ofron të mira apo shërbime për publikun "ndalohet të diskriminojë një person tjetër, i cili kërkon t'i arrijë ose t'i përdorë ato duke refuzuar t'i ofrojë një personi të mira apo shërbime në mënyrë të ngjashme, ose me cilësi të ngjashme, ose në kushte të ngjashme me ato në të cilat këto të mira apo shërbime i ofrohen publikut në përgjithësi" dhe se refuzimi, sipas kësaj pike, përfshin edhe "situata kur refuzimi në fakt bazohet në shkaqet e përmendura në nenin 1 të këtij ligji, por nga subjekti diskriminues deklarohen shkaqe të tjera, apo nuk deklarohet asnjë arsye si shkak i refuzimit" por edhe nenit 11 të këtij ligji që parashikon marrjen e masave të përkohshme dhe të veçantë që synojnë përshpejtimin e vendosjes reale të barazisë, kur mungesa e barazisë është shkaktuar nga diskriminimi, konsiderohet veprim pozitiv dhe nuk përbën diskriminim, si dhe me qëllim garantimin e barazisë dhe mosdiskriminimit:

REKOMANDOJME:

1. Të merren masa për sistemimin e tregtarëve në vende ku ata mund të ushtrojnë aktivitetin tregtar në mënyrë të barabartë me tregtarët e tjerë.
2. Policia Bashkiake të trajtojë me respekt si dhe në zbatim të detyrimeve ligjore, të gjithë tregtarët, pavarësisht komunitetit të cilit i përkasin, duke shmangur cdo lloj sjellje diskriminuese ndaj tyre.

Duke besuar ne mirëkuptimin dhe bashkëpunimin Tuaj,



Adresa: Rruga Sami Frashri, Nr. 10, Kati II, Tiranë
(Tek godina e Fondit Shqiptar të Zhvillimit)
Tel: +355 4 2431078
Fax: +355 4 2431077
e-mail: info@kmd.al
web: www.kmd.al